

RUGBYA

Baionak azken
minutuetan
galdu zuen

K. ALDUNTZIN / DONOSTIA

Toulongo Tesseirek huts egin izan balu hage-tarako jaurtiketa neurketa amaitzeko 4 minutu falta zirela, Baionak kanpoko lehen garaipena lortuko zukeen. Baloi gehiago izan zuten jokatzeko, baina Berazak egin zuen entseiu bakarra. Hori bai, entseiu bikaina, alde batetik bestera zelaia osoa zeharkatuz.

Irabazteko gogo handiz zelairatu ziren baionarrak. Aurreneko 3 puntuak Lamaisonetik lortu zituen drop-ez. Alde laburra izan zuten markagailuan talde biek. Atsedenera etxekoak aurretik 13-9, baina 60. minutuan 19-25 jarri ziren baionarrak. Aurretiaz galtzen joan arren, indarrak nondik edo handik atera eta ezustekoa ematekotan egon ziren.

Lehen poule honetan, Perpignan da sailkapenburu 12 punturekin, eta Baiona azken-aurrekoa 8rekin. Miarrizte, bestalde, alde handiz menderatu zuen Auch, 34-0. Bigarren postua zuten jokoan eta lehen zatian 10-0 nagusitu baziren ere Miarriztekoak, Auch ondo ari zen defentsan. Bigarren zatian erasora ekin zioten lapurtarrek Arrietaren maisutasunarekin eta 3 entseiu egin zituzten. Horrela, 2. postuan da Miarrizte.

Baigorrik porrot egin zuen etxean Soustons-en aurka 16-18. Berriro ere, joko hobe egin arren huts pare bat egin zuen eta galdu. Lehen zatian joko txalogarria eskaini zuten nafarrek, 2 entseiu eginez. Donibane Lohizunek galdu egin zuen Peyrehoraden 22-13 eta garazik 11-11 berdindu zuen Angoulême. Sailkapenean, Garazi 4. da 12 punturekin, 5. Donibane Lohizune 11rekin eta Baigorri azkena 5ekin.

AZKENA IZAN DADILA Getxok galdu egin zuen berriro Valladoliden, Dulcioraren aurka 28-22. Ez zuen gaizki jokatu Getxok, baina, Pepe Rojo zelaia gaiztoa gertatzen ari zaie. Ligan jokatutako 10 partiduetatik 9 galdu egin ditu eta bat berdindu. Lehen zatia aurretik amaitu zuen 6-9. Garaipena eskutan zutenean 18-22, arreta galdu zuten eta baita partidua ere.

SASKIBALOIA

Klase gehiago Baskoniarentzat

Rickey Brownek «posible» dakusa Taugres Europako Ligan izatea

Rickey Brown
Taugres-Baskoniako jokalariekin entrenatzen hasi zen atzo arratsaldean. Dan O'Sullivan ordezkatzeko etorritakoa ez zitzaion kilo soberan ikusi betiko dotoreziarekin baizik, eta klase nahiz esperientzia (37 urte) dosi handitan eskaini lezake.

LUIS KARLOS GARCIA / GASTEIZ

Rickey Darnell Brown. Mississipin (Estatu Batuak) jaioa, duela 37 urte. 2,08 metro eta 100 kilo baino gehixeago. Bere hiri-buruko Unibertsitatetik NBArara pasa zen 1980. urtean: Golden State Warriors eta Atlanta Hawks. Orain dela hamar urte, maletak egin eta Europa aldera: Brescian eta Milanon Italian bi denboraldi eman zituen; Malagako Caja de Rondan Joe Arlauckas ezagutu zuen gero; Legara berriro Venezian jokatzeko; Real Madridek 1991an fitxatu zuen; gero Italiako Livorno, eta iaz, Andorran urte lasaia igarozuen.

Joan zen udaz geroztik zain zegoen, eskaintza onen bat noiz iritsiko. Italia nahiz Greziako talderen batek fitxatu nahi izan zuen, baina inork ez zuen pibota konbentzitu jokalaria agentek Gasteiz aldetik deia jaso arte. «Taugresek oso eskaintza ona egin dit», zioen Brownek berak atzo aurkezpen ekitaldian.

Brown zaharra da. 37 urteko askorik ez da ACBn. «Adinak ez du axola gogor jokatzeko gauza bazara oraindik», esan du esta-



Brownek 37 urte ditu eta 2,08 metro da luze.

tubatuarrak. Gainera, Liga baino ez du jokatu beharko —Europarako atzerritarrek Green eta Perasovic baitira—, eta ezta partidua osoak ere, Rivasekin 40 minutuak erdibana konpartitu baizik.

Baskoniako azken fitxaketa palmares ederra dauka: Milanoko taldearekin Europako Kopa irabazi zuen 1988an eta hiru urte geroago Errekopa Real Madridekin. «Nire helburua taldea lehenengo hiruen artean sailkatzea dela badakit eta nik uste dut po-

siblea dela», deklaratu du.

Datorren larunbatean bertan jokatu egingo du, Araban Gran Canariaren aurka, eta honezkero ohartarazi diote arau berriei buruz: «Esan didate, bai, eta nire ustez oso kontu zaila da eskuaz baliatu barik zaindu ahal izatea, baina saiatu beharko». Izan ere, Estatu Batuetan eman dituen bost hilabeteotan ez du ACB gehiegi jarraitu, baina behin itzulita zera dio: «Aurten atzerritar gazte piloa dagoela iruditu zait».

HERRI KIROLAK

Arrospideren nagusitasuna, izugarria

JON OLASKOAGA / DONEZTEBE

Ikusmin handia sortu zuen Euskal Herriko Aizkolari Txapelketako finalak. Lehia ikusgarria espero zen Donato Larretxea, Olasagasti eta Arrospideren artean, baina azkenean Anjel Arrospidek erraztasun handiz lortu zuen bere seigarren titulua. Euskal Herriko txapelketako finala berriz ere Nafarroara itzuli zen, eta zaletuek Doneztebeko Bear-zana pilotalekua leporaino bete zuten. 1979an Leitzan Arria II.ak lortu zuen garaipena, eta igandean Donezteben beste gipuzkoar batek lortu zuen txapela, une honetan Gipuzkoak aizkolartzan duen nagusitasuna argi eta garbi utziz.

Arrospidek errenkadan lortu du bere seigarren titulua. Hala

ere, ez zegoen uste bezain pozik proba amaitu ostean. Bere mailako kontrariorik ez zuen izan lau kanaerdikoak, lau 60 ontzakoak eta lau oinbikoak mozteko. Egindako 33 minutu eta 37 segunduko denbora oso kaskarra da, baina arerioek arazotan jarri ez zuten leaburuarrak proba lasaia izan zuen. Donato Larretxea bigarren sailkatuari minutu eta 31 segunduko alde atera zion.

Lehenengo postuaren atzetik borroka handirik ez zegoenez, Doneztebera hurbildutako zaletuek Donato Larretxea eta Olasagastiren arteko lehiaren zain zeuden. Ordea, ez zen horrelakorik gertatu Olasagastik betekada handia hartu baitzuen oinbikoen amaieran. Hirugarren postuan amaitzeko nahiko lan izan zuen Igeldokoak. 39.05

markatu zuen eta Nazabal gazteak 39.31. Etxarri-Aranazkoa da etorkizuneko aizkolaria, nahiz eta oraindik asko hobetu behar duen podiumean amaitzeko.

Azkeneko postua ez da inorentzako erakargarria. Peñagarikano eta Mikel Mindegia parean ibili ziren eta hamar aldiz txapeldun izandakoak lortu zuen zorigaiztoko postua. 46 urte bete dituen ezkurarra proba uztekoan egon zen. Hala ere barrutik zituen indar guztiak atera zituen hamabigarren enborrera iristeko 41.22ko marka eginez. Doneztebera joan aurretik entrenamendu saio asko egin ez zituela aipatu zigun Mikelek, dagoeneko azperruta baitago. Hortaz, erretiratzeko asmoekin dagoela dirudi Mindegia beterranoa.

LABURREA

PILOTA: hiru urre
Espainiarentzat
Munduko Kopan

Iruñean jokatu eta herenegu amaitu zen Munduko Kopan Espainiako selekzioak urrezko hiru domina eta zilarrezko beste bat eskuratu du. Eskuz banakoan Apezetxeak irabazi zuen bitartean, binaka Apeztegia eta Telleria izan ziren nagusi Larruzko palarekin Casado eta Oroz izan dira onenak eta pala motzarekin Tejada eta Recalde Kubako bikoteare aurka galdu egin zuten.

FISKALEK ez dute
Graff atxilotzeko
zantzurik aurkitu

Mannheimeko fiskala den Peter Wechsungek atzo adierazi zuenez, «ez dago inolako zantzurik Stefi Graff tenislaria iruzur egiteagatik atxilotzeko». Joan den asteburuan zurrumurru ugari izan ziren Alemanian Graff atxilotetaren inguruan 'Der Spiegel' aldizkariak argitaratutako albistearen ondoren. Aldizkari honek Helmut Bauer epailearen ahotan jarri zuen hagian hirugarren atxiloteta bat egongo zela Graff kasuan.

OLAZABAL

hamargarrena da
sailkapenean

Txema Olazabal golf jokalaria hamargarren postuan da munduko sailkapen orkorrean. Hondarribitarak 10,04 puntu dauzka, eta juxtu hamabi puntura dago Greg Norman australiar liderrarengandik. Bigarren postuan, Zimbabweko Nick Price dago 16,15 punturekin. Hirugarren Bernhard Langer alemaniarra, 16,08rekin.

PAPINEK kontratua
bete egingo du
Bayern Muniche

Jean Pierre Pepin futbol jokalaria frantziarrak ez du Alemaniako Bayern Munich taldea utziko, 1996. urtera arte duen kontratua bete egingo baitu. 31 urte aurrelariak dioenez, «Bayernen jarrera argia da: München jarraitu behar dudala, kontratua bete». 1996ko ekainean Bayern utzi eta Frantziara joango dela esan du, familiarengana.